

Benny Nisbet y Pedro Bislip mester papia awor

Tico Croes: AVP lo no vacila pa acerca tribunal internacional

ORANJESTAD(AAN)--

Segun Tico Croes ciere di aña di Parlamento y apertura di e aña nobo a worde acompaña pa un sabor amargo ora e partidonan cu ta sostene Gobierno a nenga di inclui e punto di vista di AVP den e Nota encuanto Estructura Estatal di Staten.

Tico Croes ta haya cu e momento a yega pa Benny Nisbet y Pedro Bislip papia. El a indica cu sin sosten di PPA y ADN, no ta posible pa MEP asumi e postura cu el a adopta.

Tico Croes a bisa cu MEP mester di e alianza cu ADN y PPA pa el a silencia e voz di AVP pasobra AVP a bisa cu Pueblo di Aruba tin e derecho pa dicidi pa su encuanto futuro.

Segun Tico Croes Pedro Bislip y Benny Nisbet por drenta historia como e Indori (e miembro di Parlamento cu a haci independencia di Surinam posible atrabez di un maniobra den Staten) di Aruba.

Mientrastanto AVP lo percura pa su Nota alcanza Hulanda y e partido lo no vacila

pa acerca tribunal internacional y instancianan

internacional pa asina muestra cu MEP no kier respeta e

derecho sagrado di Pueblo di Aruba pa dicidi pa su mes.